

四庫全書

集部

欽定四庫全書

兩宋名賢小集卷二百九十

宋 陳思 編

元 陳世隆 補

梅屋詩稿

許棐字忱父海鹽人嘉熙中隱居秦溪種梅數十樹  
構屋讀書自號梅屋慕香山東坡畫二像懸室中事  
之嘗曰四壁天地萬卷春風庾嶺香孤山玉樂而可

以忘死者有梅屋集

夜泊長河

黃帽貪程夜泊遲  
市樓燈火歇多時  
滿懷風月無分付  
却借漁翁短笛吹

訪潘叔明

一室寬於養鶴籠  
荻簾疎透雪花風  
怪來几案無顏色  
春在題詩卷子中

明妃

漢宮眉嫵息邊塵功壓貔貅百萬人  
好把香閨舊脂粉  
艷粧顏色上麒麟

醉起

午醉醺醺到日晡起呼茶盃炷燠爐  
隔窗幾點敲花雨  
仔細聽時却又無

怕子

萬縷縱橫如妾恨一方輕薄似郎思  
多時不繫纖腰舞  
却對花前拭淚痕

晚泊臨平

晚卸風帆泊市橋  
稅亭民屋揔蕭條  
秦封不到河邊柳  
送往迎來枉折腰

元夕後懷河上作

自從樓閣罷燒燈  
未有今朝一日晴  
煖拆葑邊冰翼破  
寒留山頂雪痕輕  
嬌驄已印尋芳跡  
小妓新翻鬻唱聲  
每箇旗亭商一醉  
也應排日到清明

沈子壽郊居

屋外猶餘地百弓，經鋤知費幾年功。  
栽蔬少似於陵仲，種菊多於靖節翁。  
偃屈溪山詩卷裡，破除風月酒杯中。  
近來又喜禪機透，一顧叢林萬衲空。

贈葉靖逸

借我城居一丈寬，五車書向腹中安。  
聲華馥似當風桂，氣味清於着露蘭。  
朝士時將餘俸贈，鋪家傳得近詩刊。  
回看舊隱西湖上，誰伴沙鷗度歲寒。

鄭介道見訪

步頭楊柳種多年今日方維勝客船掃石共看山色坐  
枕書同聽雨聲眠溪羹旋煮蓴絲滑野飯新炊芡玉圓  
不管歸心忙似箭強留吟過菊花天

贈龔彥質

慈湖分與半窗燈照得襟懷徹底明

得一作出  
明一作清

蒲席夜閒

猫占卧筍興春暖鶴隨行爐香欲盡經猶誦研墨才濃  
句已成歲晚弟兄俱白首一樓風雨話深更

題常穆仲巽碧

舫樣一亭小依山復靠池每來分席坐須憶一湖時竹  
弄當窗影花添蘸水枝人間風浪惡泛宅幾天隨

趙叔魯

天上除書駱驛飛謫仙何事得來遲旅懷寬似居家日  
學力高於未第時山帶晴霏橫畫軸水流清響入琴絲  
世間多少王孫貴無我寒泉一句詩

秋江漁父

小舟輕似一鷗飛戀月隨風慣不歸困卧蘆花深雪裡



夜寒添益舊蓑衣

山間

越得山間笋蕨春  
借厨烹煮自炊薪  
倩誰分我枯羹去  
寄與中朝食肉人

木山父書院

占得文房一丈強  
地幽雖夏亦清涼  
瓶花誤倒水侵案  
書葉亂掀風滿牀  
薜長密藤遮半壁  
桐分疎影出低牆  
客來莫道無祇待  
只啜茶甌却味長

蠟梅江梅同瓶

苗裔元從庾嶺分  
兩般標致一般春  
淡粧西子呈嬌態  
黃面瞿曇現小身  
不羨腰金橫玉貴  
來尋嚼蠟飲水人  
只愁花謝香狼籍  
桃李如何接後塵

贈畫魚沈秀才

寫字摛文不療飢  
生涯換得頗新奇  
錦心暗織臨淵網  
蓬鬢潛繅釣雨絲  
落筆易於投餌處  
得錢多似出罾時  
漁翁枉占烟波濶  
不及君家小硯池

贈北磻

天下名山行脚遍依然形影瘦伶俜支吾寒暑袈裟耐  
變眩烟霞筆硯靈對客敬如堂上佛讀書道似藏中經  
石頭路滑終難到不是詩禪莫扣扃

雪曉

臘雪連宵接曉飛錦衾公子未曾知起來攜杖敲梅樹  
扶得輕盈壓損枝

閨怨五首

眉鎖從春不暫開  
懶移心事向妝臺  
恩情却似殘花片  
去逐東流不肯迴

別後相思瘦玉肌  
不堪重着看花衣  
恨君得似梁間燕  
社日辭家社日歸

月引庭花影上窗  
悶和簪朶卧空牀  
春寒翠被無人共  
閒却熏爐一字香

離愁一點濃如黛  
強把金篦掃不開  
新月幾番呈巧樣  
薄情夫婿未歸來

小院東風去住中  
春愁元不隔簾櫳  
自家顏色凋零盡  
却對花枝惜墮紅

枯荷

萬柄綠荷衰颯盡  
雨中無可蓋眠鷗  
當時作疊青錢滿  
肯信池塘有暮秋

庭樹

今年庭樹看花稀  
因是耽書失事治  
何處結巢雙喜鵲  
却來刪得幾枯枝

春晚

推過詩編把酒斟  
挽春幾句讓鶯吟  
門前却喜無人掃  
積得殘花一寸深

贈臨上人

遶湖山疊翠  
師住最高層  
野偈書林葉  
茶鐺煮澗水  
松筠為道友  
日月是禪燈  
倘許分峯隱  
甘為有髮僧

客路

客路久驅馳  
秋深兩鬢知  
田家投夜宿  
漁竈寄晨炊  
契

分燈前影生涯索裡詩遙憐故園菊荒草沒霜枝

鍾雋卿見訪

荒園知非延客地漫分苔石坐移時杯中淺注三行酒  
几上同看數首詩樹未經霜飛葉早菊因潤月放花遲  
自無景物留君住却恨西山日半規

題倦庵

自扁庵為倦斯名恐未然醉中頻瀉破遊屐几磨穿新  
種竹多活舊栽花更妍門前春水漲催發孝廉船

贈元松軒

白髮蕭蕭客帝都故園閒却種瓜鉏平時不信為儒誤  
今日方知涉世疎烟浦未尋歸去艇雪窗猶讀借來書  
詩名壓盡江湖客要在唐人向上居

題叔清郊居

哦松未了賦歸歟旋買田園結草廬數畝竹陰惟欠鶴  
半池山影不妨魚舉杯多是沽來酒揀架無非讀過書  
我已倦為都下客顧君分與把茅居



書郭子度壁

禁苑精廬是切隣  
衣巾雖舊不沾塵  
鐘魚聲裡吟連曉  
花柳香中醉過春  
和土重泥燒藥竈  
買絲新接釣魚綸  
遶湖十萬人家住  
如此清閒有幾人

雁字

點畫分明印碧空  
迴鶯近鵲勢差同  
月邊映得銀鈎體  
雪裡摹成玉箸工  
斷續似經秦火後  
悲涼如在楚詞中  
愁人筆硯俱荒廢  
倩寫相思寄便風

宮詞二首

卧聽羊車輓夜雷  
知從誰處宴酣回  
蟾光也解君王意  
隔箇簾櫳不入來

同入宮來幾許人  
因何遣妾護長門  
雲鬟半晚香腮瘦  
却愛菱花鏡子昏

古墓

石人猶自立蒿萊  
拂讀殘碑字字哀  
隣塚已流寒食酒  
野風分送紙錢來

憶鄭元甫

別後黃花兩度殘  
天涯彼此寄書難  
幾回雁字斜陽裏  
聊當平安一紙看

贈芸窗

能書能畫又能詩  
除却芸窗別數誰  
只是霜毫冰蠶紙  
才經拈起便新奇

戌婦詞一首

半落缸花午夜閒  
戍衣裁就寄君難  
雁來不帶平安字

却帶邊風入帳寒

贈陳宗之

六月長安熱似焚  
鄧中清趣摠輸君  
買書人散桐影晚  
卧看風行水上紋

傷春曲

日日望郎郎未歸  
玉肌寬盡縷金衣  
春心撩亂強拘束  
碎剪紅綃補舊枝  
紅綃才向枝頭住  
殘花又逐東風去  
顧花飛入笑筵中  
莫入愁人斷腸處  
愁人見花人自羞

花見愁人花也愁飛花有盡愁無盡柳外一聲黃栗留

四時宮詞各一首

因見落花心覺悟薄羅襟上淚痕乾容顏縱是花枝好  
能得君王幾日看

碧玉涼梳落枕邊懶梳雙鬢學新蟬恩情不及班姬扇  
縱是炎天亦棄捐

涼夜誰同玉簟眠湘波冷浸一枝蓮君王不學中秋月  
處處分身處處圓

雪壓長門消未盡  
夜衾堆盡舊宮羅  
鴛鴦瓦下垂冰筋  
未抵相思玉筍多

郭評事

廷評滿腹貯陽春  
筆下從來活幾人  
廳小似分幽寺住  
俸輕如在舊山貧  
堆書教子猶疑少  
倒屣迎賓不厭頻  
欲效林宗巾角墊  
自嫌雙鬢有紅塵

輓吳春伯

入門諸子哭寒衣  
痛說嚴君屬纊時  
病重刀圭難作效

家貧飯舍不如儀從春屢有登臨約近日方無唱和詩  
拂拂南屏山下路悲風吹亂綠楊絲

輓郭子度

連年染患貌梳黃廬扁猶無起死方穉女自敲尸畔磬  
隣僧來炷佛前香生涯漫有千書卷受用惟存一奠觴  
聽說茶毗心更苦拭乾清淚又成行

寄吳宜之

文公徒弟無多在學術應如壽數高好句先教諸子和

墊巾翻被俗人嘲湖邊茶店同誰坐井畔柴扉欠我敲  
昨夜相思眠不穩月眉斜印落花稍

瑛上人

十二三時便出家何曾頃刻離烟霞晨持數卷日方上  
夜梵千聲月未斜洗鉢不經鷗浴水挿瓶嫌採蝶殘花  
儒冠誤我駸駸老何日蒲團共結跏

木芙蓉

芙蓉艷金谷秋色錦機中霜樹不知醜葉與花爭紅



東歸道中

芙蓉波面出罾魚，廉似城中買擔蔬。  
欲試膾刀還不忍，恐傷千里寄人書。

籬籠禽怨

子金新購入雕籠，恨在嬌聲斷續中。  
昨夜羈雌何處宿，落花殘月故巢空。

破鏡詞

寶鏡一從分破後，不堪磨拭照妝鈿。  
倩誰攜上青雲去。

補得今宵缺月圓

龔彥質恕可二丈

兩龔當暑客秦溪  
旋買黃紬替熟衣  
想見西湖風月裡  
藕花凝望載詩歸

張聲父

城中破屋妻兒住  
自向招提借小房  
壁上碑文皆古篆  
案頭書冊半仙方  
月嫌碎竹遮窗暗  
風疑飛花入坐香  
點檢未如僧相處  
只多髭鬚幾根霜

秋齋卽事

桂香吹過中秋了菊傍重陽未肯開  
幾日銅瓶無可浸賺他飢蝶入窗來

泛剡

水濶無風似有風蘆花搖落櫓聲中  
鷗魚一點驚猜意認作當時載雪翁

醉歸

半醉歸來卧不成月華霜彩爛中庭  
茶鐺凍結香匱冷

只把梅花嗅得醒

湖上曲

新晴旋蠟遊春屐半濕香泥恰好行  
琢得小詞腔未穩  
往來花下怯歌鶯

趙野雪

載雨駕雷翻覆頃漏星藏月卷舒閒  
若將雲與詩人比  
政恐雲無日日閒

古硯送趙明府

一片端州古硯甌翁孫相授當良田寒梅磧下和冰洗  
秋桂窗前滴露研學字不工空費紙吟詩雖苦未成編  
贈君攜去薇花畔草詔閒時枕匣眠

戲題花

一片落花題一字湊成一句怨春詩縱橫貼在窗紗上  
巧似迴文織錦時

寄衣曲

蘆花風緊雁飛飛便寄邊衣也是遲妾把剪刀猶覺冷

況君披甲枕戈時  
願君百戰圖勲業  
馘項殲羸頻獻捷  
傳取貂蟬金印歸  
無負君王無負妾

畫眉曲

日印花枝欲滿窗  
旋磨鸞鏡試新妝  
恩情只似春宵短  
眉黛空如柳葉長

宿閒林步

山禽棲定澗蛙鳴  
時復鵲巢雜數聲  
昨夜酒添春睡重  
幸無憎愛到天明

宮女詞

妍醜三千衆恩情一例輕  
妾身雖寂寞天下却升平

真珠園

芭蕉葉上題詩字雨後來看半不全  
餘濕未勝濃墨補且攜卮酒到花前

湖邊

湖邊開到木芙蓉攬盡荷花十里紅  
紅蓼莫慙顏色淺榮枯同是一秋風

讀南嶽

春來遊未遍湖山已是風光一半殘  
細把劉郎詩讀後鶯花雖好不須看

花

牆頭新露一枝紅  
塵盡隋人萬彩工  
香艷便棲雲鬢老  
也勝飄泊晚西風

別友

分付離觴莫滿斟  
酒深還與恨同深  
自憐不及春江燕



一路相隨伴好吟

不語僧

默坐蒲龕若塑成客來惟聽小鐘鳴  
却嫌庭樹無禪力  
時有風枝雨葉聲

孔海翁

鑑湖湖上寄閒身好景應同賀監分  
梅下有船供載雪  
荷邊無地可鉏雲吟人多倩刪詩稿  
名士爭求作序文  
畫卷書箋偏藏屋其他生計盡輸君

題縣樓呈竹坡

令君聊試棟梁材結就譙樓亦壯哉疑是海宮新湧出  
不然仙府乍移來無人敢帶私心入萬戶皆知正道開  
細數代瓜能幾日曉籌昏鼓莫相催

寄題竹坡

郭外移來費俸金幾年擡舉玉成林更無餘地栽他樹  
儘有高枝着卧禽寒影似傳東野貌清聲如寫伯夷心  
呼童少殺青瑤簡染月濡雲寄我吟

數椽

數椽茅屋傍林塘，幽似山僧獨住房。  
夜靜只憑猿守宅，晝閒時有鶴升堂。  
旋收落葉供茶爨，細搗枯花作印香。  
書冊滿牀詩滿索，別無生計亦無妨。

送友人為僧

知心朋友雲霄裡，三尺官綾取不難。  
禪衲乍披身愈瘦，儒冠新脫頂微寒。  
數編詩稿聊收起，一藏經文旋取看。  
惟我塵緣推不去，蕭蕭華髮倦漁竿。

地爐

穴地為爐了一寒肉屏氈帳任無緣  
晨燒樹下沾霜葉  
夜煮山頭瀉月泉  
已借陽和歸故絮  
更分光焰到殘編  
百年貧富灰埃盡  
荒塚累累夜燒邊

春雪

春風吹雨作花飛  
寒勒芳程幾日遲  
惟有庭前老梅樹  
謝渠添補落殘紅

輓沈晏如

不信詩人一例窮如公半世又成空  
湖邊便欠尋梅友  
籬下應無採菊翁  
雪片堆平閒藥竈  
雨聲敲碎舊漁篷  
墓銘吟稿兒封寄  
血淚斑斑浣紙紅

贈相士

澗水溪水似鏡清  
自看寒貌已分明  
煩君別相江湖友  
來歲誰魁淡墨名

陳裕齋墨戲

臨帖欽書外尤深  
破墨工萬峯千嶂  
趣片紙尺綃中雲

暗孤村月潮生滿樹風自嫌我已老摩硯一無功

題吳秋潭隱居圖

到處有茅堪蓋屋誰家遷榿不成籬秋潭何事經營晚  
應是無人會買詩

題摩雲悟師

老松陰下訪摩雲仰望青雲隔幾塵不是倚空梯百尺  
只緣中有道高人

田間

欽定四庫全書

目錄  
卷二百九十

田間久不到草木半蕭疎鷗占沉舟浴蛭分破壁居僕  
溫攜到酒隣送買殘蔬未說催租事黏窗且讀書

題塾處

數畝家園枕碧波樹桑疎處補花窠簷低不碍儒冠入  
橋矮才通釣艇過雲笛旋裁門外竹雨衣新織檻前莎  
有時牛背看書罷一曲春風寧戚歌

孫祺御新居

幾年銖累束修錢才向湖邊置一廬種竹庭深難得月

養魚池小易為泉山呈好畫當書案柳撒輕絲罩釣船  
酒力半酣詩思倦矮牀相對白鷗眠

招高菊澗

時在縣齋

歸買秦溪屋一間才如都市僦樓寬門前養草如花賞  
壁上黏碑當畫看自改舊時詩未穩獨斟新酒不成歡  
髯仙只在淵明宅泥濘相邀寸步難

李明甫雪中小閱

令君蒙雪教千兵一點妖氛不敢生和氣旋回弓力軟



寒光微映劍光明  
民居似倚銀城壯  
海道如鋪玉簫平  
入蔡歸來方夜半  
畫堂歌管未收聲

西真圖

翠水池邊宴早秋  
雲謠聲裡月西流  
醉歸不信乘鸞穩  
却擘蓮花作采舟

書北庵門

十度來敲九不應  
隔離空見竹青青  
不知池裏黃金鯽  
聽講楞伽幾卷經

贈術士張痴

伶俐不如痴從來吾亦知才吟詩好日便是命窮時鼠  
笑瓶無粟蝸嫌壁有碑五行修得否髭鬚已絲絲

謝毓齋李尚書惠詩序

綠野堂邊種藥成已班髭鬚復青青謝庭子弟皆英物  
漢殿公卿半學生爭捧溪藤未妙畫競磨崖石乞新銘  
如何海角孤吟者文集中間也挂名

葉克齋

歛浦租船只載詩一廉如此似君希  
雙親猶道行裝重  
多帶羅紋一硯歸

題趙子固春山上寺圖

望得招提見程猶半日間馬嘶曾到處  
僕指未行山風  
遞松聲遠雲連草色閒何如添箇我坐石聽潺湲

湯婆子

一冬專寵道人房不藉華清賜浴湯  
皤腹却無璋瓦分  
矮身難稱綺羅妝春生蝴蝶半牀夢  
暖迫梅花一帳香

醉倚肉屏君莫羨  
北邙多少黑頭郎

送寫神李肖巖入道

一掣塵緣去學仙  
鶴程風露漸高寒  
白玉樓中逢鼻祖  
為傳吟貌寄予看

寄趙倉

麾節交迎出帝城  
滿朝皆羨板輿榮  
一川熨輟春風暖  
八郡同瞻霽月明  
吳苑鶯花新管領  
秦溪桃李舊栽成  
應憐倦卧寒窗者  
煮藥爐邊聽雪聲

送趙子梁

梅福舟行速離觴不暇斟雖然交日淺頗覺別情深宿  
處雁相伴到時鶯對吟水心新塚下替我一沾襟

得閒亭

柳風雖小絲絲裊花雨無多點點香惟有吟毫閒未得  
染紅濡綠一春忙

題錢慶豐醒庵

不向杯中物吟邊僅有君自無沉醉分非效獨醒人捲

筇進明月開門放宿雲揀茶敲未遍又摘露芽春

輓周倅

真是分風月歸來無俸錢人皆嗤拙宦天又嗇長年舊  
宅寒潮外新螢古樹邊一詩哀不盡簷雨對潸然

上趙蘭坡

身迫雲霄自不知只如師友講論時驅龍駕鳳陽水字  
剪月裁霞太白詩兩院炷香熏畫卷晴窗添水浸花枝  
十年漫走江湖上咫尺蘭坡却到遲

欽定四庫全書

兩宋名賢小集  
卷二百九十

上嘉禾趙守

邦君一念只寬民真個龔黃見後身和氣蒸為千耒雨  
煖雲栽作萬襦春座中長有清吟客庭下渾無健訟人  
諸郡盡能依此樣世間那有一家貧

劍鋒

朝潤郅支膏暮澤樓蘭血何如塵土中蝕為無用鐵

題常宣仲草堂

隔市能幾步幽趣踰山林鑿池小如斗水淺魚自深簷

任樹枝礙堦從草色侵不肯一鋤斫恐傷春風心朝出  
賃仁義暮歸炊古今客來無可款石鑪添水沉

題張俞仲竹屋

削成千竈簡此屋是餘村長有清風至渾無俗客來猿  
當吟案立鶴趣釣船迴添足歲寒計栽松復種梅

李方庵款梅

梅花惆悵三年別香鎖空庭幾風月今年花發主人歸  
依舊主人貧徹骨小枝分立硯屏邊無酒酬春燭焰寒



數葉殘書緒未了喚起山童敲鳳團

融春小綴

開爐十日併當融春小室為六藏計亂書中得舊稿數  
紙稿自甲午至己亥詩不滿三十更散失不得傳則  
與日月俱棄矣併綴數文為融春小編非千金契帚  
誓尺壁餘陰也梅屋許棐題

樂府

妾心如鏡面一規秋水清郎心如鏡背磨殺不分明

小窗寒燭夜結紐綴郎襟不結尋常紐結郎長遠心  
郎心如紙鳶斷線隨風去願得上林枝為君縈留住

題舒王遊半山圖

驢載新詩僕抱書松聲禽語當傳呼不知邂逅耕田者  
問着青苗免役無

題錢叔恭立齋銘後

蔣魁  
作銘

拄義撐仁難着脚十人着脚几斜歌此銘不特為君助  
今古儒家砥柱碑

舊漁竿

制斷江湖幾線風  
蓑衣閒掛餌瓢空  
何因獻入君正手  
持向磻溪釣太公

草屨

江湖蓑笠舊交情  
石滑泥深步轉輕  
恰是革靴蹤跡險  
官程高處越難行

贈劉相士

滿鏡秋霜鬢影寒  
此生堪笑復堪憐  
煩君只相看書眼

更對青燈得幾年

宗之惠梅窠水玉牋

百幅吳冰千蕊雪對吟終日不成詩憶君同在孤山下  
商畧春風弄筆時

月澗惠硯滴梅腦

手不題詩已數年硯塲相伴學枯禪為君蘸濕元暉筆  
寫出江山雪後天

踏雪尋梅興未償衣襟賴有隔年香銅匱更炷冰花腦

不到孤山也不妨

春思

嫁得蕭郎不戀家幾年流落在天涯  
滿懷多少傷春事  
嫌殺門前叫賣花

送趙丞

汝詩

竹梢風露松梢月木抵吟丞氣味清  
笑問兩年何所得  
錦囊詩重俸囊輕

贈墨僧

老硯磨穿事不成，萬言堆裡鬢星星。  
願隨君去柯山下，收拾殘烟寫佛經。

重陽乏酒

黃花冷笑竹籬邊，笑我牀頭乏酒錢。  
帶雨折來無用處，碎按金屑和茶煎。

燭

長身夜占銀臺立，焰焰光搖頂上珠。  
貪向華堂照歌舞，不知灰得寸心無。

術代者言

不聞沸鼎烹夷叔那有雲臺畫四凶  
自與心君消息了却將甲乙問窮通

贈錢相士

我貌君容一種寒鷺漂鷗泊廿來年  
我詩吟就無人買君相公卿煞得錢

觀松巖畫卷

老屐相隨四十年慣看蒼翠聽潺湲  
今朝細玩松巖畫

猶有行吟未到山

吳江道中

一別吳松二十秋  
敗荷枯柳摠新愁  
白頭交友凋零盡  
賴有寒江幾個鷗

題陸宣公堂

一編奏議從頭讀  
句句氷聯玉綴成  
不是德宗嫌切直  
自緣唐室未昇平  
諂魂盡逐殘星滅  
義魄長隨霽月明  
我亦愛君憂國者  
歲時來一拜先生



欽定四庫全書

兩宋名賢小集  
卷二百九十

天

送趙蘭坡

弟判嘉興藹政聲  
蘭坡兄又出專城  
如將天上一蟾影  
分作人間兩郡明  
江冷雪隨帆幅去  
路晴梅夾轎牕行  
開藩便拜歸班詔  
也與玉山添重名

題趙恕可山臺

繞宅無非罨畫山  
吟臺更對好峯巒  
錦囊低掛花梢上  
玉子輕敲竹廡間  
小硯買來猿解捧  
異書編就鶴同看  
主人出赴功名會  
澗水自清雲自閒

小菴道人

滿面瘡痍癥胸中一泓雪醒吟鶴背風醉卧鷗邊月不  
費嚇鬼符不試爐金訣笑問舊蓑衣秋來添幾結

題丘竹坡新地

長安富貴海十客九倦還君去不著意君歸無愧顏舊  
圃一二畝新居十數間花尋直樹種竹簡斜枝刪詩句  
滿筆寫書編到處安冬簷春日煖夏戶風晝寒不是時  
令外自緣心地寬天下政多事未須牢閉關

題雪林畫卷

亂洒春霏着紙寒  
玉成天地片時間  
有人讀盡江湖冷  
却愛尋常卷畫山

梅屋第三稿

已亥至癸卯詩不滿二十首  
甲辰一春却得四十餘篇  
疑詩之多寡遲速似有數也  
天或壽予予詩之數固不止此  
然當以貪多務速為戒  
梅屋許棨題

蘭花

竹底松根慣寂寥肯隨桃李媚兒曹  
高名壓盡離騷卷不入離騷更自高

郭南湖見訪却適有出一絕為謝

一蓬風雨偶歸遲見說君來扣我扉  
童子因眠梅樹下不曾放過鶴雙飛

枯樹

幾年柴立荒塍下春雨秋風摠不知  
一點陽和到桃李紅紅白白便盈枝

錢謙齋新居

住破吳松江上屋杭州城外結新廬  
未尋陸羽烹茶具  
先借淵明種菊鉏山入樓中成好句  
月來牕下伴殘書  
御街車馬無行處誰肯抽身覓退居

上趙克家太守

說着嘉興太守賢野梅官柳亦歡然  
貧民不識重租苦  
老吏難將一事瞞但有詩書堆几上  
更無歌舞到樽前  
凡為郡者皆如此天下何由不治安

趙宰瓊花圖

祠下靈根無別種凡花誰敢鬪榮枯被君分種鵝溪上  
從此人間有兩株

寄然鏡潭

鏡潭烟烟秋無底著一纖雲也是多禪外當無些子事  
如何猶有作詩魔

茉莉

荔枝鄉裡玲瓏雪來助長安一夏涼情味於人最濃處

夢回猶覺鬢邊香

題猗綠堂

蕭蕭萬竿玉深護讀書堂夢起秋聲薄詩撓夜色涼敲  
茶風遞響滴硯露涵香不雜有花樹花紅不久長

趙山臺寄詩集

海雁叫將秋色去山臺鈔寄好詩來菊花過了梅花未  
自有花從筆底開

寄題東洋

東洋占得江山勝  
安頓亭臺到處宜  
夜中秋明月影  
朝朝寒食好花枝  
長箋短軸真行字  
舊軸新編倡和詩  
只隔一朝飛不去  
悵懷惟有白鷗知

寄友

已奏春班名字了  
不妨閒作幾時遊  
家僮未要裝詩擔  
見說三高索唱酬

紅梅

不堪冷照黃昏月  
強倚春風作杏粧  
雖得容顏暫時好



欽定四庫全書

兩宋名賢小集  
卷二百九十

三

欠他肌骨舊來香

迂張宰

堯章

倦骨畏寒如畏虎可曾一步出柴扉因迎令尹西郊外  
折得梅花滿把歸

謝施雲溪寄詩

折得桂花三數枝雲溪又寄幾篇詩詩香入在花香裡  
韵似龍涎火煖時

梅屋第四稿

餞梅

十日九風雪差見今春寒梅花辦歸計一點心欲酸所  
秉太孤潔有此末路難來年復相見一笑賀平安

築城曲

日將西杵聲急一聲聲自死腸出城高不特土累成丰  
是鋪填怨夫骨儒坑戰地骨更多十二金人隨鬼泣

烏夜啼

丈人屋侵雲馬愛丈夫屋涂人亦愛烏烏聲喜相續屋

底間蛾眉環坐理絲竹絲竹無新腔  
馮汝聲為曲丈人  
一賞音瓦礫棄珠玉移噪隣翁家  
聞者皆吐逐

馬塍種花翁

東塍白髮翁勤樸種花戶  
盆賣有根花價重無人顧  
西塍年少郎荒嬉度朝暮  
盆賣無根花價廉爭奪去  
年少  
傳語翁同業勿相妬  
賣假不賣真何獨是花樹

泥孩兒

收瀆一塊泥裝塑恣華侈  
所恨肌體微金珠載不起  
雙

罩紅紗厨嬌立瓶花底少婦初嘗酸一玩一心喜潛乞  
大士靈生子願如爾豈知貧家兒呱呱瘦於鬼棄卧橋  
巷間誰或顧生死人賤不如泥三嘆而已矣

染絲上春機

染絲上春機春濃絲色淺妾心隨梭飛郎心如軸轉  
染絲上春機錦成貴無價不忍裁成衣怕剪鴛鴦破

長門怨

妾身如蓮根沉埋淤泥底雖有白玉姿無人為拈洗

妾身如亂絲卷藏箱篋底願上鴛鴦機無人為分理

秋風辭

颯颯秋風來一葉兩葉墜燕子動歸心薄情知也未  
颯颯秋風來衣衾愁未整莫作閨中寒且作天涯冷

三臺春曲

昨夜微風細雨今朝薄霽輕寒簷外一聲啼鳥報知花  
柳平安

春是人間過客花隨春不多時人比花尤易老那堪終

日相思

蝴蝶飛

蝴蝶飛蝴蝶飛紅邊迷了紫邊迷粉老香乾何處歸不  
學蜜蜂做家計勤苦之中有甘味

破琴

幸逃煮鶴烟枯羸卧鳥几向來千萬音今在何人耳舊  
譜傳不真零落幾張紙瓦缶空雷鳴牙夔喚不起

破硯

碌碌礧礧間得此一雋石磨我三十年貌鰲雙鬢白渠  
亦苦我磨眼穿流淚墨老蟾在傍咲兩窮自相厄

對鏡詞

煙護杏腮寒日襯桃腮煖惟有鏡中花東風都不管

織錦詞

綵絲愁緒雜春機唧唧聲中日又西織到花枝連理處  
玉聰門外一嬌嘶

毋忌

一別音容歲幾更紙灰飛盡淚猶傾  
最憐春雨相將足  
縣上有田誰共耕

春思

朝來一陣無情雨  
敲得庭花半欲殘  
燕子不知人冷落  
飛來簾底避春寒

春雨

老來慵把種花鋤  
片紫纖紅一任無  
不忍今春孤負雨  
自收簷水浸菖蒲



燕

處處亭臺宴好春  
唱花歌柳調爭新  
梁間不用多言語  
回耳聽君有幾人

石菖蒲

一碧生涯水石濱  
縷風絲雨瘦精神  
前身恐是巢由輩  
怕着人間半點塵

草

生長冷階閒砌畔  
一春知見幾花飛  
雖雨露無多子

却到秋來綠轉肥

不是東風有愛憎為憐微細頗加情  
胚紅孕紫寧交晚  
且放青青寸草生

池魚

深淺生涯足浮沉世念輕莫貪鉤上餌  
去作鼎中羹

柳

青青得意春三月撩弄東風舞腰活  
莫道長條舞得多  
長條先被行人折

小盆花

小小盆中花春風隨分足花肥無賸紅葉瘦無欠綠心  
傾幾點香也飽遊蜂腹太盛必易衰荒烟鎖金谷

花願

未到無生無滅地聊為春風露紅紫不願隨風起蝶飛  
願就枝頭抱香死

諭柳

不須嬌逞舞腰肢不須巧盡官粧眉只把千絲萬絲結

結住情人無別離

選官圖

排銜累職甚分明除罷皆由采色行縱有黃金無好采  
也難平白到公卿

倚綠惠燭

剪剪春生萬卷堂一花知勝幾螢光癡兒不識半行字  
只解高燒照海棠

落花

落花傳語五更風能旁亭臺幾日紅把似匆匆又飛去  
不消裁染費春工

落梅

紅杏枝枝嬌似染綠楊處處密成圍苦無顏色相追逐  
自起東風作雪飛

贈壽醫師

富雪  
岑

軒窗開處摠湖光誦罷難經納晚涼雨濺荷香沾古衲  
月移松影照禪牀燃燈就取燒丹火煮藥先留淪茗湯

二豎三彭都見佛人間無病亦無方

陳宗之疊寄書籍小詩為謝

江海歸來二十春閉門為學轉辛勤  
自憐兩鬢空成白猶喜雙眸未肯昏  
君有新刊須寄我我逢佳處必思君  
城南昨夜聞秋雨又拜新涼到骨恩

送趙竹潭

已彊詩仙一夜留任教清早放船休  
恨身不似梅花片飛入寒篷伴遠遊

贈僧虛中

僧趲雪前到梅花猶恨遲  
略譚殘歲夢便和早春詩  
僵雁依船宿寒猿捧硯隨  
吟單未須捲重見是何時

兩宋名賢小集卷二百九十

欽定四庫全書

兩宋名賢小集卷二百九十一

宋 陳思 編

元 陳世隆 補

雲卧詩集

吳汝式字伯成盱江人有雲卧詩集

遣興

弱齡性淡泊鄭圃吾其師及茲拙生事窮窘常經時無



方可紆急何以宣中懷柴門蔽殘席咏書倦徘徊呼兒  
促觴至目翫天雲飛山鳥送新響日遲花露滋頽然醉  
欄下不省何如時雖非富貴樂富貴乃所非踈松碎明  
月密竹篩清風親友昔與別若謂行相從延企邈不及  
音容隨想生諒彼亦耿耿飛爽留空形援琴不能寐意  
乃多於聲晤言豈無偶眷眷詎可忘編蓬諧夙心尊古  
豈文義所得靡有言應酬聊爾耳室中無萊婦童弱偶  
成四圍樂豈無思達此天亦銳客來問長鬚新醅可第

未行行陟高岡一顧俯烟水客去不肯留吾歸且休矣

歲終呈一齋

磊砢千文松清陰蔭林丘豈無棟梁用匠伯不見叔匠  
伯恐未良棟梁終有求天風呼偃蓋五雲常為浮學道  
非學世韜精養中和紆朱各自貴誰肯聆商歌皦皦大  
聖心昭然空自多著書後子雲千載應不磨

酬王汝

礫穰畢春氣長羸換新綠爽風吹涼光細餌釣山淥脩

欽定四庫全書

卷二百九十一

魚喫水香菰蒲削藍玉  
老景結清和心花委濠濮  
日暮雲倒飛苦雨濕茅屋  
奇哉五碎金青草眠黃犢  
天行貴葆真心骨迥凡俗  
一尺黃菊花秋風播芳馥

游石仙分韵得觀字

閒攏兩袖秋步入冲寂  
觀古樹老雲中仙居毀  
巖半是時零雨高葉脫  
淒風亂怪禽走何忙  
澁水流不漫那知張郎  
仙譎幻敢懸斷雷書貯  
紅崖愚下浪傳贊符碑  
儻長靈鬼物豈歌喚尚  
云劍埋山安得急摧斷  
冷翁亦張

徒精氣不知散死坐豫樟空鑿竅競窺看何不莫山原  
不然棄江岸烏鳶與螻蟻豈食吾一貫獨流天地間萬  
古亘光燦神仙固渺茫此事良可惋忍哉偷狂兒更擣  
泥腹爛我來擬少休亭壓不敢玩黃冠四三人拙野只  
欲竄延坐無好言令我住涼館飯餘且縱觀逸興薄霄  
漢琴鳴著高彈奕勝出奇筭嘯咏壺隱樓撫事發長歎  
大書同人名聊欲紀遊玩陰霾淪輕寒日色修昏晏倩  
人買村醪煮茗疊看按清坐二更後一睡各鼻鼾曉來

登巖頭棘路解羈絆劃開天盡寬遠景過飛翰幽藂摘  
新查窺險身發汗居然束歸裝重下西巖畔我思古之  
人豈只局窮閑觀海登太山深高世間冠斯巖雖荒榛  
樂事實昭煥人心本然同今古未容判終當駕雲風高  
蹈無畔岸作詩示兒童茲遊吾豈憚

竭來

巖上竭來觀白雲翔鸞奮鶴浮天英斜開錦繡春樹滿  
溶溶半露遙山青忽然變現成蒼狗萬里長風鶴無有

海龍塞氣不敢吹日照虛空無老時

嶺上竭來弄明月千里銀光寒不缺蝦蟆魍魎走死盡  
直數秋毫上金闕心如月月如心嗒然獨據無絃琴  
騰騰轉空白日畫詩帶流星過南斗



兩宋名賢小集卷二百九十一

欽定四庫全書

集部

兩宋名賢小集卷二百九十三

四

詳校官中書臣閔思毅

助教臣常循覆勘

總校官編修臣王燕緒

校對官助教臣汪錫魁

謄錄監生臣朱恩



欽定四庫全書

兩宋名賢小集卷一百九十二

宋 陳思 編

元 陳世隆 補

鷗渚微吟

趙崇鈔字元治開封人為都昌令都昌屬江右僻邑  
故書事詩有山雲欲到地街鼓又催衙風緊魚休市  
官貧飯帶沙之句有鷗渚微吟一卷

調漁者

山明松雪水明沙一曲清溪著釣槎我已浮湛君漫浪  
漫煎我水試君茶

頗愛

頗愛樂天齊物我夢隨吟賞洛中橋桃花細馬載楊柳  
半面春潮紅未消

食化

海食多詭心齋食令人魯山中食齋人甚冷肺腸苦

青陽

青陽滿芳蕤流連度丘園眄睐不忍折恐傷造物恩

夜坐

自炷芳蕭讀道書元文豁落走龍魚松梢露色掛北斗  
一夜風前學步虛

尋真夕對

春雲弄月黃金絲春山草木皆仙姿松根對坐日西夕  
羣峯當前立青壁鏗鏗虛壑含古音靜聽宛是商山吟

洞石微開月當戶剪水冰絃心手語

有贈

別意參差遶碧欄外頭斜月逼人寒  
鈎簾恐礙雙棲鵲  
乍可桃花隔霧看

簡雲卧

憶君心事如流水流向江頭作暮潮  
想得潮平沙有雪  
自鏗鐵片和吹簫

空城雀

空城雀黃口黃啾啾空城無人種禾黍飲啄飛鳴由得汝

山間

山回霧氣濕生意鞠碎隱石道苔蘚春松花鬱金粉

東風

東風吹梅梢飄搖泣香雪下有野草根蘄然競時節

野園

野園對客無杯勺共坐茅欄理釣車片月漸低風露冷

隔簾山鬼嘯梨花

至後

惜惜雲氣繞江城至後寒輕詎可憑兩日南風將雪信  
牀前蝙蝠夜翻燈

大孤

大孤溶溶決眼青小孤江色春冥冥隔江淮壖幾千里  
枯荻蕭摻朔風起佳人何在遙相望我無羽翼從君翔  
為君暗整真珠裳綠蘅翠芷參差香

壯節亭二松

壯節亭前野碧滋，  
髯龍飛去忽經時。  
祇應黃犢蒼藤路，  
尚有清泉白石知。

東風吹桃花

東風吹桃花，  
花光射春林。  
相看各媚斌，  
艷冶搖人心。  
慙蝶下新綠，  
游魚上清潯。  
百年一湏臾，  
史觀契飛沉。

曉起

雨漂窗紙濕，  
成瑕風壓甕。  
瓶卧枕沙曉，  
起無悰。  
餽粥冷。

自添新水救梨花

江上

清露初生紅蓼秋  
爽風先到木蘭舟  
釣絲不捲波浪穩  
夢入蘆花數白鷗

仙思

水殿風清急景斜  
靈君初下五雲車  
碧羅寶扇雙題字  
記是誰人詠落花

麻姑擗麟不肯食  
飛猿嶺上餐松實  
月冷天空涵曙光



露色凝烟白如蜜

東溪夜泊

雪滿汀州風滿林  
霽光空徹夜深深  
推篷却受梅花月  
自噴橫簫調楚吟

甕天

康廬天戶廳東偏  
本吳西山遺址

不見甕天人但見石上字  
誰能負甕去奪我寥天思  
甕破奚有餘甕在奚不足  
吟作甕天辭摩挲石苔綠

雜興

潮平烟歛月明高  
霽雨涵空見羽毛  
我自無能君了了  
檣竿獨倚調離騷

日日西風坐石苔  
手捫蒼壁倚雲開  
却來平地觀空色  
不信碧雲天際來

都昌書事

世事可無酒  
春藤還有花  
山雲欲到地  
街鼓又催衙  
風緊魚休市  
官貧飯帶沙  
天機不得問  
暮色欲棲鴉

了頭巖

烟雨斑斕石蘚春  
墜雲誰夢寶花顰  
行人總被虛名誤  
到得傾城又誤人

月巖

玉丹仙蛻馭能翰  
更作琉璃世界看  
大地山河渾忘却  
漫依桂樹舞青鸞

次壁間韻

雨又入簾風又斜  
東風吹客客思家  
浣紗西去誰家子  
青絹圓裙插杏花

山月溪風兩自由紫蘭綠桂等離憂狂歌鬱鬱成何事  
一片夕陽蘆荻秋

海棠開盡故清寒漠漠梨花暮色閒酒滿綠樽愁滿酒  
醉凭枕障認巫山

半髭嬋娟垂兩鴉驚潮微隱寶簪斜客愁正自遊絲亂  
莫帶叙頭百結花

往體

積雪久不解下有希世珍志士緼袍間苦心終不伸安

得白日光能照清夜  
蟬

皓彩青雲端飛光落溟渤  
渾河與清沚同受明月魄  
勿以清濁分天光本無隔

志士惜流光游子念長道  
流光如奔霆長路漫浩浩  
饑人忽夢飽百憂悉傾倒  
真妄安足論榮名以為寶

松下

松梢涼露警孤鶴  
潭面北風蟠老蛟  
蛟老涎腥波浪惡  
獨吟碎月看松梢

癸卯除夕客中

膝下傳觴事已非，辦香千里隔庭闈。  
推心遠憶新阡上，寂寂低松雪乍晞。

數日

數日東風欺病骨，侵凌晚色作輕寒。  
客來坐久無談柄，共看游絲上井欄。

梅

新陽斡坤軸，枯朽皆光榮。  
稜層冰雪中，復見天地精。  
姑蘇

射神所為伯夷聖之清太白抱轆軻靈均擁芳馨是予  
心魂間不受纖芥縈獨立萬花先皎皎非近名溪流鑑  
寒柯游風吹落英山明霧氣濕月落參旗橫犀虛妙音  
發一洗萬慮輕紛紛兒女姿慙愧東風情

狹斜

吳姬凌寒吹玉笛手彊誤作遲遲聲却來拋眼調行客  
中有二月東風情東風二月楊花滿伯勞朝啼芳思亂  
狹斜繡轂易為愁邂逅相逢莫腸斷

破褐

生松鬱寒灰破褐出殘絮  
童兒不耐煩微吟起身去

湖中

汀蒲獵獵起涼颼  
碧藕香中獨立時  
機事兩忘吾喪我  
扁舟吟過水仙祠

新堤

淡烟蓼草雨絲絲  
小醉微吟倒接籬  
吟到水西雲影北  
莞然一笑已無詩



書事

東鄰老翁寒不寐百結懸鵲枝悲涕自云子孫學灌田  
不識江湖與風水大兒里胥縛送州小兒逃遁卒未休  
老夫忍饑特未死犁耙典盡春無牛身為王民合徭役  
運米操舟操不得江湖風水未足愁櫂喪檣傾誤人國

答碧山

欲種梅花無古根手移蘭茁上甕盆却憂逼仄傷蘭性  
自下清招為返魂

答維溪

維溪插架三千軸  
葺莖紉蘭得自娛  
會須握手論活法  
靜看碧水生元珠

學詩

神仙不可學  
願學長不死  
學詩如學仙  
吞霞潔塵滓  
渚花流水香  
烟霏暮山紫  
涼颼入修竹  
一笑鳴綠綺

雀

短翅編爛貝  
花紫逐日飛  
行曉霜裏祗  
知背爪求自肥

肥甘累人心弗知天寒日暮向何處前路多山慎勿去  
吳兒織網連素空一落牢籠腥血紅

南內

已剪諸郎百慮輕驕兒長大又生獍祗愁南內無歸日  
南內歸來萬古情

兩宋名賢小集卷二百九十二

欽定四庫全書

兩宋名賢小集卷二百九十三

宋 陳 思 編

元 陳世隆 補

順適堂吟稿前集

葉茵字景文笠澤人與徐璣林洪相倡和江湖間詩人也不慕榮利蕭閒自放所居草堂三楹榜曰順適取少陵洗然順所適之句脩然有遺世之想焉吟稿

五卷閒雅似仲先清矯似和靖  
豈其志趣相契故口吻亦合邪

古意

悠悠澗邊人  
濺濺澗中水  
水流無返時  
人生流水耳

偶成

春陰晴復陰  
因物悟浮生  
杜宇鄉心重  
楊花世事輕  
知非蘧伯玉  
覺是晉淵明  
此意誰人會  
騎牛話偶耕

蘇隄

南北山園翡翠隄  
隄邊綠漲軟琉璃  
參差臺榭無餘地  
雜遝輪蹄了四時  
楊柳又多前日樹  
梅花祇少近人詩  
停篙不看春風面  
閒伴漁翁理釣絲

野望

白水沿堤護綠苗  
鷄鳴犬卧柳邊橋  
數家雖不成村落  
一夢何曾到市朝

次潘紫岩虎丘韻

潭深劍氣銷  
樹瘦嵐光薄  
石壇古即今  
藤花開又落  
晉

士已結廬吳市猶舞鶴沉吟發幽懷人世舟藏壑

別韓菊山

結廬甫里隣顧瞻誰與遊掩荆樂魚鳥握管成樵謳有  
客賞茲趣柳下時停舟自締十年契投簪不願侯一朝  
過我別匪伊趨東州敢問何為爾讀書松竹幽輦母遠  
之官漫作升斗謀執手話勞役揮杯忘獻酬離懷聿云  
悲重來如此不何當羽厥身千里雲悠悠上下相追逐  
赤城少延留其中有玉人而可為我儔此志不可得迨



迨水東流載言涉征途逢修暑氣適紛締自金玉脂車  
裹糧餽我將植佳菊長對南山秋

曲水流觴

以下十詠  
題水竹墅

蘭亭飲者徒因物寓天理著眼靜中觀坎止流行耳

峭壁寒潭

百丈崖懸立一泓流綠漪品題無好語摹寫冷泉詩

安樂窩

受用十二時不離方寸地門外自風波行之以無事

野堂

風來無市聲景物占深靜  
鷗狎堂上翁時來點天鏡

竹風水月

造物無盡藏散在林泉中  
結亭相周旋人與萬境空

廣寒世界

鼻祖舊游地留得老桂香  
有能培植之此香傳諸郎

盟鷗

同此江湖心有盟非知己  
我亦畏機人莫入驚波裏

得春橋

策驢風雪中東君獻詩料花驚非故吾聊復索花笑

賞心橋

沿堤過竹所履聲驚龜魚人生適意耳何必駟馬車

尋源橋

蹠踐水窮處雞犬非人間褰裳不用涉迤邐逃秦山

愛閒亭

僧舍

苔深雨徑寒花落選爛斑此處無名利誰人肯往還性

慵綦局廢坐久茗甌閒禪觀非難事休官學住山

江湖偉觀

此地舊寒碧留題護竹君窓虛不礙月壁老易生雲一  
水東西隔兩山南北分未堪低著眼世事正紛紛

何氏書堂

晉何楷讀書之地因名何山

千歲松陰護一亭風來猶帶讀書聲雖無芳史摹勲業  
自有青山說姓名客撫豐碑苔剝落春歸暗徑草生成  
幾年訪古謀清隱好借虛簷著短檠

天平山謁范文正祠登白雪亭

為謁先儒馬鬣瑩倚藤得得上天平直疑寺外峻嶒石  
猶是胷中數萬兵松障四開心目快山泉一軟骨毛清  
坐間恰動思親念隱隱白雲何處生

次林和靖先生梅韻

世上羣芳未敢妍獨將春色占南園生來清質十分瘦  
肯受紅塵一點昏東閣詩成應動興西湖仙去漫招魂  
便須結客陪花笑勾引幽香入酒尊

欽定四庫全書

兩宋名賢小集  
卷二百九十三

五

蟠松

靈巖寺草堂之前  
舊有蟠松尤古

一晦清陰覆客衣相逢疑是草堂時  
隱然錯節盤根勢  
欠者昂霄聳壑姿  
天遣蟄龍蟠石窟  
人攀巢鶻俯霜枝  
百年培植今誰屬  
何待歲寒然後知  
松本潘氏之物  
今歸於鄭

寄所思

浙浙竹下風活活橋畔水蕭蕭掩柴荆  
去去隱君子夙  
夜勞我思之德洵且美  
瞻彼南山阿有桂發叢蕊  
奮手折其榮懷袖香盈尺  
願為靈鵲飛遞聲入君耳

春去

幾陣紅侵野草一團綠染庭槐夢裏未知春去翩翩蝴蝶飛來

歸途

春來天氣半陰晴那更奔馳一月程又恐花時成草草還家插柳佐清明

山行

青山不識我姓氏我亦不識青山名飛來白鳥似相識

對我對山三兩聲

次出郊韻

支藤乘興入春郊  
梅壓疎籬亞竹梢  
剩喜此行詩有料  
吟來渾不費推敲

生日口占

舉室相先起五更  
為翁誕日壽金觥  
癡兒未識翁年甲  
五十年前今夜生

時五十一

酒邊次趙東閣韻



竹褪粉痕新銷磨九十春中年真宰性上古太平人有  
夢詩將聖無愁酒不神靜看紅紫路翻覆幾回程

友人自淮至

別子若為久于心終不忘一杯評舊雨兩鬢對新霜客  
裏春行早愁邊夜坐長明時成擯棄無語及淮鄉

雪城

愛向其中艤短篷眼前景物絕玲瓏神仙窟宅垂楊裏  
圖畫溪山落照中甚是繁華輸俠少也須幽勝屬衰翁

世間風月無如此賣鶴來謀地一弓

次中秋不見月韻

五分秋色到銀河應是蟾蜍浴細波握手相期千里共  
舉頭無奈片雲何愁邊幸自逢歡伯清處何須著艷娥  
未可來宵倦遊賞光輝依舊向人多

雨中梅

鈴鐺竹外枝啼粧凌曉霰東皇不主盟對人作此面

即事

竹暗筍無數江晴水有痕田蛙喧麥隴野犬卧柴門

過溪

筍輿軋軋亂山中籬落桃花潑眼紅小駐渡頭呼艇子  
一溪淺綠漾晴風

白髮

半世持竿笠澤濱鬢邊留得幾莖春近來白髮無公道  
暗把黑頭饒貴人

泊舟溪口

萬柳陰中繫客船  
桑條如竹葉如錢  
大姑小婦挑甘薺  
揺手烏兒正二眠

賦順適堂

取少陵洗然  
順所適之句

暗觸少陵機  
茅居峙竹扉  
安時貧亦樂  
聞道詠而歸  
鳬鶴從長短  
鳶魚自躍飛  
吾猶臧穀耳  
夷跖是耶非

除夜立春

別歲傳佳話  
論文憶舊盟  
黃柑凝臍釀  
爆竹帶春聲  
節序有終始  
兒童爭送迎  
此身強健在  
列炬到天明

梅

疎影幾黃昏  
明明野水濱  
未風先信  
息無雪更精神  
一白見直色  
萬紅隨後塵  
自來花下飲  
肺腑盡生春

晉子生日

今朝阿晉紀  
桑弧郎罷持  
杯勉讀書  
斷莫繞家覓梨栗  
更須為國習  
耒耜義方授  
汝心還愧陰  
德于予計肯疎  
學取老萊如  
許壽年年綵  
袖拜庭除

自和

壯士須張燕角弧男兒須誦聖人書譬如田叟祈多稼  
未有春時不荷鋤分內功名從早晚腹中學問怕空疎  
老夫猶記昌黎語潢潦朝盈夕已除

又有感

一雁雲間落勁弧經秋不見寄來書人情自昔如翻紙  
世道從今甚借鉏塵夢隍中知得喪爵羅門外看親疎  
歲寒獨有梅花月香影年年到戶除

別可山

松江之左可漁可農古樹陰陰碧波溶溶子契予好携  
家而從載笑載語乃棹輕篷冥訪前修天隨室過中心  
孔嘉奚居奚止有熏自南景物清美槐柳于前煩歌潛  
弭我有旨酒與子酌之既醉且舞且歌而詩陶然樂只  
厥情怡怡一日舍去豈不念茲客懷先秋與言欲別屢  
止屢辭行計已決送子于舟期我乎雪散哉前邁于時  
炎熱惆悵若失延佇長津復面猶賒奈何夕晨豈無他  
友白首如新念子實繁融融天真北山有梅南山有雲

下有猿鶴中有隱居千里命駕余敢不塵乃志必獲載  
歌斯文

止庵

驛路  
施茶

時事艱難路嶮巇得來名利亦何為趙州茶罷速歸去  
莫待鐘鳴漏盡時

讀釣臺集

萬仞山頭放一絲爭吟好句計當時能詩若不能垂釣  
祇恐先生不愛詩



遊西洞庭山

漫遊三十載，屐甚暈蒼苔。  
兩地無多里，一生能幾回。  
洞深龍未蟄，丹熟竈無灰。  
已覺忘身世，松梢有鶴來。

山行

未了行春債，因哦遣興詩。  
寒多啼鳥噤，路滑蹇驢遲。  
久雨紅辭樹，深林綠授枝。  
驚心衰朽日，容易過花時。

入山

到來非俗境，一片隱心生。  
晚露沈山色，春禽和水聲。  
逢

人多古貌對語率真情同在無懷世爐薰荅聖明

蟬

柳外聲殘日未殘棲身未穩擇枝安不須過有螳螂慮  
黃雀從傍冷眼看

螢

自明自滅度方池熠熠飛來去覺遲入坐點衣情分熟  
納交元在讀書時

蚤

壁間吟不待秋時吟苦中宵動客悲勸汝不須催婦織  
家家五月賣新絲

酷暑

動息汗流珠無風可滌除炎威獄下吏生意鼎中魚席  
地杯冰水扃門謝客車因思遊宦者曾未憶家居

秋至

節序暗催移清商漸屆期旅懷蚤早計涼信柳先知萬  
事到雙鬢餘生消幾詩最憐梁上燕巢穩又歸時

苦雨

農事正紛紛天時異所聞  
舉頭方見日翻手又為雲  
茅舍蛙分部槐庭蟻失羣  
裁成憂國疏齋沐告吾君

出郊

多謝天公佐好晴只今載酒作郊行  
飛花戀客閒中意  
遠笛迎春景外聲已把物情歸幻相  
且將足力趁浮生  
南堂辦得休休計  
燕雀充庭亦賀成

謝朱宜中隸字

隸法如公有典型拙中藏巧混天成因觀體製超前輩  
旋闢軒牕乞扁名氣象晉人道且勁源流漢刻古而清  
得來喜對兒曹語一字千金勝滿籬

鱸膾

園園洞庭陰西風苦不情墮罾雲葉亂落又雪花明列  
俎移桃菊香麝搗桂橙四腮傳雅詠巨口竊嘉名誤上  
仙翁釣羞陪虜使醎甘腴殊机肉鮮脆厭侯鯖銀鯽將  
同調絲蓴久共盟祗緣鄉味重自覺宦情輕風度偏宜

酒頭顱尚可羹謫仙空汗漫何處膾長鯨

竹夫人

風神林下秀寵數夢中新假使不如肉爭知見似人茗

奴甘謝事黃妳喜論親凜凜百年操從教進退頻

王夫  
人神

情散朗有林  
下風氣晉傳

城下小菴

水綠城詰曲水際暗桑麻籬落深村路閭閻處士家烟

篁黏半籜風柳颺輕花隨喜跣趺坐香寒月影斜

棹雪

放船中流天模糊淅淅霎霎鳴芟蘆萬頃剎那成玉壺  
柔艖蕩漾歌吳飲老漁直前相招呼骨相子猷洵且都  
其人豈是斯人徒相顧而笑掀虬鬚汝為汝兮吾非吾  
剡溪風景今何如誰能為人作畫圖予方奮臂持竿獨  
釣于江湖

壽藏十韻

門限何須鐵因為淺近謀假令長富貴消得幾春秋壽

固緣心地人誰肯首丘未能忘後慮是亦墓前修繭室  
名猶在魚山志可求迴岡許埋骨吉兆協眠牛懶作化  
臺號何妨引客遊不愁飽螻蛄最喜近松楸物變終于

盡吾生行且休年年春色裏洗勺聽溪流

池水燕談王  
樵自號贊世

翁預卜為窀名繭室曹植登魚山有終焉之嘆遂營為  
墓唐史姚崇孫勗自為壽藏于萬安山副土為臺曰化  
臺唐司空圖預為塚棺引客遊壙中賦詩酌  
酒莊子曰在上為鳥鳶食在下為螻蛄食

田父吟

去年積潦苦無收今歲逢人說有秋未擬香粳供一飽



穆穆新草蓋簷頭

又

夜登車桁畫耘秧怕說風傷與水傷  
歷盡艱辛雙鬢白  
今秋方覺稻花香

又

老天應是念農夫萬頃黃雲著地鋪  
有穀未為兒女計  
半償私債半官租

又

記得年時竈不烟土倉今番遶門邊已占此後無憂色  
綠遍村前菜麥田

又

逢逢社鼓佐豐年酒熟那逢釀雪天擘橘煮雞償一醉  
布衾烘暖抱孫眠

林可山至

梅花山底伴雲閒漫逐閒雲出故山君慰我思君莫去  
一詩先遣白雲還

雜興

兀兀北窓下嘈嘈林間鳴聲各奏小大諒亦隨其形倏  
然氣肅烈一夕俱沉冥試語塵中士細聽秋蟲聲

又

七十云古稀予年三之二來景殊無多那復就枯瘁寬  
步驚畏途無心慨時事何以怡餘生一日委一醉

兩宋名賢小集卷二百九十三